

Den su apertura oficial:

Impresionante Expo Lens di mi wowo 2015 den Archivo Historico diasabra anochi



ORANJESTAD (AAN) – Diasabra anochi a tuma lugar den Archivo Historico Aruba, e apertura oficial di e exposicion anual “Lens di mi wowo” cu ta un presentacion di potret di fotografonan di prensa tanto di antaño como esnan mas actual.

E expo aki ta wordo celebra tur aña ya pa ocho aña consecutivo, organiza pa e reportero Leo Vrolijk, como un gesto di aprecio pa e trabao di nos reporteronan sea fotografo riba su mes of redactor fotografo. E semper ta habri oportunidad pa un y tur presenta su potret-

nan, y e biaha aki tabata tin mas of menos 200 potret di tur tempo den e exposicion. E potretnan aki a representa tanto e decadanan prome cu digital cu mester a laba roll den un camber scur, y esun moderno for di momento cu tur cos a bira digital inclusive



e potretnan, cu apesar di su diferencianan tecnologico, semper ta keda un base ineludible: e arte di tuma un bon potret, potretnan cu contenido, cu detaye, pues cu tin un lenguahe cu ta complementa sea un texto periodistico of un contexto artistico.

Un exposicion sumamente bunita, cu a wordo dedica na e dos di e pioneronan grandi di prensa na Aruba, ambos cu raiznan den DIARIO sr. Harry Croes y Robby Burleson.

Cada un a ricibi un album cu potretnan di nan mes produccion, como recuerdo.

Tambe a duna un reconocimiento na Check Point Color, cu hunto cu e dos coleganan galardona a corta e cinta pa declara e exposicion habri.

Check Point Color a hunga un rol hopi importante den labamento di potret pa prensa, te cu e tecnologia digital a drenta impone su mes na mundo y no menos na Aruba.

Sra. Marjorie Vermeer hunto cu su tata sr. Rob Vermeer tabata presente y ambos a hiba palabra y a elabora riba nan historia cu prensa.

Sr. Pierre Rafini, director di RBC tambe a hiba palabra na cuminzamento y a muestra su solidaridad cu Leo Vrolijk y su proyecto den cual el a kere semper y tin ocho aña ta colabora cune como sponsorship, locual e ta haci cu hopi satisfaccion y aprecio pa prensa su trabao.

Leo Vrolijk tambe a hiba palabra a relata e motibo pa cual el a bin cu e proyecto aki, pa trata di trece prensa hunto siki-iera durante e evento aki unda un y tur cu ta saca potret por participa, pasobra, y el a bisa esaki cu duele, awendia prensa na Aruba no ta uni mas cu otro. Impresion cu tambe sr. Harry Croes a trece dilanti. Di nos colega Robby Burleson por lesa su speech den articulo apart.